

Date – 22/12/2025

Time - 18:30 -18:40Hrs

## AKASHVANI AIZAWL

### REGIONAL NEWS BULLETIN

#### HEADLINES ( EVENING )

1. Sorkar Laipuiin inhlawhfate tana dan thar a siam, Labour ` Code chu Mizorama mimal hnuai inhlawhfate'n tha an tih thu an sawi.
2. Sericulture Director Pu V.Zothansanga'n Mizo mipuite tan pangang khawi chu eizawna tling a nih thu a sawi.
3. Kum 2028-a Mizoram puma smart meter vuah hman turin Aizawl khawpui chhungah smart meter 6454 vuah a ni tawh.
4. India leh New Zealand te chuan sumdawna lama inremna Free Trade Agreement (FTA) an ziak.

<><><>

#### LABOUR CODE

Sorkar Laipuiin inhlawhfate tana dan thar a siam, Labour Code chu Mizorama mimal hnuai inhlawhfate'n tha an tih thu an sawi.

Akashvani Aizawl zawhna chhangin Aizawla private company pakhat hnuai thawk Pu Victor-a chuan sorkar laipui hmalaknaa Labour Code 29 awm thin 4-a khaikhawm a ni chu ram chhunga inhlawhfa thinte tan a tangkai dawn hlea a hriat thu a sawi a, a bikin inhlawhfa inchhawrna mumal awm lova thawk thinte tan chuan tha lehzuala a hriat thu sawiin, an hlawh chungchang bakah hamthatna felfai tak awm tur te chu hnathawktute chuan an chhawr dawn hlea a hriat thu a sawi a ni.

#### *Byte : Victor*

Sawrkar laipui chuan November ni 21 khan ram chhunga inhlawhfate tana dan thar labour code chu a taka hman tan turin a puang a. He dan thar hian kum tam tak lo hman tawh labour law hlui chu awlsam leh huapzo zawkin a siam a, nitin inhlawhfa chawpa eizawngte tan hlawkna zau zawk thlen thei tura duan a ni a, Mizoram sorkar a Labour, Employment Skill Development & Entrepreneurship Development hotute chuan he dan thar hi Mizoram ah pawh hman vat a nih theih nan hma an lak thu an lo sawi tawh a, Labour Code thar hnuai hian hnathawka mi chhawr tuten hriselna lam kaihnawih health insurance eng emaw chen an tumsak tur a nih bakah hnathawktute dinmun chawikanna tur a awm nual thu te, mi tupawh mimal dawr emaw thil siamchhuahna hmun nei emaw chuan an hnathawkte

appointment letter felfai tak an pek ve a ngaih tawh dawn thu a sawi a. Kum khata ni 180 thawk chin te chu hlawh kiam chuang lova chawlh (paid leave) an neih theihna tur te, hmeichhia leh mipa hlawh inang te, zan lama hmeichhia te hna an thawh theihna tur te leh hriselna kawnga a chhawrtute mawhphurhna hrang hrang Labour Code tharah a tel thu LESDE hotute chuan an lo sawi tawh a ni.



## **SUGAMYA BHARAT YOJANA**

Rualbanlo te puala hamthatna sawrkar laipuiin a ruahman Sugamya Bharat Yojana hnuaiyah Mizoram sawrkarin hmalakna hrang hrang a kalpui.

Rualbanlote tana hamthatna hrang hrang a awm theih nana sawrkar laipui ruahman chu Mizorama rualbanloten a hlawkna an chan ve theih nan hmalak zel a ni a, Social Welfare & Tribal Affairs Department hotute chuan Mizoram rualbanlote tan disability pension department kaltlanga pekchhuak thin a ni tih an sawi.

Department hotute sawi danin Mizoram district dangah department kaltlangin mumal takin pension sem thin a ni an ti a, National Social Assistance programme hnuaiyah sorkar laipui atangin rualbanlo pension hamthatna an dawng thei tih sawiin sorkar laipuia Ministry of Social Justice and empowerment hnuaiyah directorate te pawhin rualbanlo te puala hamthatna buaipuitu NGO te tan tanpuina a dil theih an ti bawk.

Department hotute chuan Mizoramah rualbanlote tan Federation of Mizoram Disabled Organisation pawl thar a ding an ti a, Mizorama National Institute of Locomotor Disorder (NILD) hnuaiyah wheelchair, ke lem siam a theih tih sawiin Zoram Medical College ah an inbunthar bakah mamawh tan pan theih an ni a ti bawk.



## **SERICULTURE DEPARTMENT**

Sericulture Director Pu V.Zothansanga'n nikum 2024 ah pangang metric ton 597.306 leh raw silk metric ton 67.22 thar chhuah a ni a ti a, Mizo mipuite tan pangang khawi chu eizawna tling a nih thu a sawi.

Sericulture Department Director in Akashvani Aizawl News a hrilh danin Mizoram-ah chhungkaw 4,546 in pangang khawi chu eizawna atan an hmang a, khaw 211 ah pangang vulha eizawng an awm thu sawiin Mizoram chu state dang ngaihtuahin an vanneih thu leh sik leh sa-in a zir avanga pangang chi hrang 4 khawi kawp vek an nih thu a sawi a, pangang khawitute tan zawrh chhuahna lamah harsatna an la tawh loh thu sawiin state pawn thlenga thawn chhuah tham erawh an la thar chhuak lo a ti bawk.

Director chuan District tinah Sericulture Department-in technical staff dinin mipuite hnenah training pek an ni a ti a, a tui mi te chu Department in theihtawp an chhuahpui thin tih sawiin Pangngang khawitu te'n sorkar atanga puihna an dawn thin a, Central Silk board hnenah an project-te thlen thin niin pawmpui an nih hnuah Ministry of Textile kaltlangin tanpuina an dawng thin a ti bawk.



## **SMART METER**

Kum 2028-a Mizoram puma smart meter vuah hman turin Aizawl khawpui chhungah smart meter 6454 vuah a ni tawh.

Akashvani Aizawl in Power & Electricity Dept-a Superintending Engineer (SE) pahnih Pu Lalrinmawia leh Pu Zothansanga te smart meter leh electric billing system chungchanga a kawmnaah he thu hi sawiin, sorkar laipui hmalakna hnuaiah Smart meter chu India ram pumah electric bill pek that loh avanga hloh tam lutuk tih tlemna atana ruahman a ni an ti a, tun dinhmunah Aizawl khawpui chhungah chauh la vuah rih niin, 6454 vuah tawh a ni a, smart meter vuah hna hi contractor in kum 10 chhung a enkawl dawn a, tun dinhmuna a hlui thlak runpui an neih mek hi kum 2028 hma in Mizoram pumah zawhfel hman tum a nih thu an sawi a. Smart meter vuah kim hunah chuan office atangin reading an lak vek thei tawh dawn avangin electric bill dik zawk a awm thei dawn a, electric bill pre-paid a an kalpui hunah phei chuan mi zawng zawngin bill an pek a ngai tawh dawn a, bill pe tha lo leh bill ba te awm tawh dawn lo a, hmasawna ropui tak a ni dawn tih an sawi a ni.

Tun dinhmunah Mizoram pumah chhungkua, hnathawhna hmun, school, hall leh Biak in te tiamin electric consumer nuai 3, sang 8,722 an awm mek a, heng mite hian online in bill an pe thei vek tawh a, online a pek chu a him bakah a awlsam zawk avangin mipuite chu online in bill pe vek tura an duh thu an sawi a, bill pek chungchanga harsatna tawkte an chhuichian theih nan PEDM consumer apps hmangin bill thin pe se an duh thu an sawi bawka a ni.

<><><>

## **AIR NEWS**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

## **OPHTHALMOLOGIST**

Naupangten mit hrisel zawk an neih theih nan inchungah phone khawih lova pawna thiante nen infiam tir a pawimawh hle tih mithiamte'n an sawi.

Akashvani Aizawl in Civil Hospital Eye Department-a HoD Dr Lalhuthangi Hmar a kawmnaah he thu hi sawiin, tunlaia mit lam harsatna tawka an buaipui tam ber chu tarmit chawh ngai an ni deuh vek tih sawiin, nitin Civil Hospital OPD ah mit tha lo 100 vel an en ziah tih sawiin, heng zinga zaa 40 vel chu tarmit chawh ngai an ni thin a ti a, school chawlh laia naupang mit inentir tam zawk pawh tarmit vuah ngai an ni chu pawh a ti hle tih sawiin naupang ten phone an en nasat lutuk chuan mitmu a thang vak a, tarmit minus power hmanga lo siamthat a ngai thin a ti a, mithiamte chuan naupangin inchungah phone emaw TV leh gadgets dang emaw khawih ngut ngut lova pawnah thiante nen an infiam chuan a tarmit power minus 5 a pung tur kha a veng thei tih an sawi a ti a, naupang ten mit hrisel zawk an neih theih nan hmanlai nun dan anga kir leh a, naupangte chu inchungah khung lova an thiante nen zalen taka pawna infiam tir a pawimawh hle tih a sawi a ni.

<><><>

## DIABETOLOGIST CONSULTANT

Khawvel changkang zelah mihringte khawsakphung leh taksa hahdam tawh lutuk chuan zunthlum natna a thlen theih avangin mithiam ten ei leh in bakah insawizawi thin turin mipuite an chah.

Akashvani Aizawl in Civil Hospital-a Diabetologist Consultant Dr Lalruatpuii Hlawnmual a kawmnaah he thu hi sawiin, khawvel changkang zelah mihringte khawsakphung leh hnathawh dan vanga taksa hahdam tawh lutuk leh eitur tui an ei nasa chuan zunthlum natna a thlen thei a ti a, zunthlum natna lanchhuah dan langsar zualte chu tuihal huam huam te, zun t̄euh t̄euh te, mit uihlit sek, pan leh natna dang dam thei lo, ha nget leh ha hni hrisel thei lo, vun thak dam thei lo, khaw hmuh fiah lo, rihna tlahniam t̄euh, taksa nguai te a ni tih sawiin, heng atang hian mahni pawhin a inrinhlelh a, zunthlum neih leh neih loh inendik thuai a pawimawh hle tih sawi a ni.

Dr Lalruatpuii Hlawnmual chuan Zunthlum veite tan doctor te chawh damdawi ah chauh inngat lovin mahnia inenkawl theih tam tak a awm a ti a, nunphung tihdanglam a pawimawh em em tih sawiin, ei leh in abikin thil thlum insum a, vawi leh khatah thil ei t̄euh loh te, insawizawi a, taksa tihchet tam te chu a pawimawih hle tih a sawi a ni.



## FTA

India leh New Zealand te chuan sumdawwna lama inremna Free Trade Agreement (FTA) an ziaik. Prime Minister Narendra Modia leh New Zealand Prime Minister Christopher Luxon te chuan vawiin khan FTA ziah anih thu hi an puang a. Pu Modia hian telephone hmangin PM Luxon hi bia in FTA chungchang hi an sawidun a. Kumin March thlaa New Zealande PM Luxon-an India a lo tlawh tuma ram pahnih indawrna bawhzuina kalzel a ni a. PM Modia hian New Zealand nen Free Trade Agreement an ziah chuan ram pahnih sumdawntawwna kum nga chhungin a letin a ti lian dawn a ti a. New Zealand atanga sumdawwna dollar tluklehdingawn 20 chuang hu Indiaa rawn lut tur chu lawmawm atih thu social media ah a tarlang bawk a ni.

